



LE GOUVERNEMENT
DU GRAND-DUCHÉ DE LUXEMBOURG
Ministère de la Famille, des Solidarités,
du Vivre ensemble et de l'Accueil

Äntwert vum Minister fir Famill, Solidaritéit, Zesummeliwwen an Accueil, Max Hahn op d'parlamentaresch Fro n°3534 vum honorabelen Deputéierten Dan Hardy iwwer de Podcast „Grenzgeschichten“.

1. Wéi wäert d'Regierung den tatsächlechen Impakt vun dësem Podcast op d'Integratioun vun däitsche Grenzgänger moossen?
2. Wéi eng Indicateure kënnen benotzt ginn, fir ze evaluéieren, ob Grenzgänger hir Rechter a Flichten dank dësem Podcast besser verstinn?

Et läit an der Natur vun der Saach, dass de geneeën Impakt vun dësem Podcast schwiereg ze moossen ass, besonnesch wat d'Kenntnisser vun de Leit betrëfft. Donieft ass allerdéngs ze soen, dass et ee vun den Ziler vum Podcast ass, de Biergerpakt ze promouvéieren, an d'Leit dozou ze beweegen sech anzuschreien. Deemno kënnen d'Umeldungen am Biergerpakt e vaguen Indiz sinn, quitt dass hei natierlech och vill Facteure spille kënnen.

Des Weideren erméiglecht den Hosting-Service et, genee Statistiken doriwwer ze féieren, wéi oft an op wéi enge Plattformen all Episod vum Podcast gelauschtert gëtt. Sou sinn op de 3. Mäerz 2026 5 vun den insgesamt 7 Episode publizéiert ginn a si bis elo vun iwwer 2.000 Persoune gelauschtert ginn.

Hei ënnendrënner sinn déi gängeg Benchmarks fir Downloads an deenen éischte 7 Deeg no der Verëffentlechung, déi d'Performance vun engem Podcast aschätzen:

- ≥ 27–30 Downloads am Mëttelfeld (Top 50 % vun alle Podcasts).
- ≥ 100–110 Downloads: ~25 % vun de beschte Podcasts.
- ≥ 450–460 Downloads: Top 10 %.
- ≥ 1.000 Downloads: Top 5 % vun de Shows.

Bei ganz spezialiséierten Theme sinn des Benchmarks méi niddereg. Besonnesch am däitschsproochege Raum leien etabléiert Corporate-Podcasts ongeféier bei 150–500 Downloads no 30 Deeg.

Op Basis vun dësem Benchmark kann een also soen, datt *Grenzgeschichten*, an domat och d'Iddi vun engem Podcast fir Grenzgänger op Interessi stéisst a gutt ugeholl gëtt.

3. Wat sinn d'Grënn, firwat d'Regierung de Podcast-Format an net en anere Medium gewielt huet?

De Format vum Podcast huet sech generell als e beléifte Medium duerchgesat, dee parallel zu aneren Aktivitéite ka konsuméiert ginn. Well Grenzgänger vill Zäit op hirem Wee fir op d'Aarbecht an zeréck verbréngen, ass e Podcast als eng sënnvoll Offer consideréiert ginn. Ausserdeem soll de Podcast als eng Porte d'entrée fir Grenzgänger fir déi weider Offer vum Biergerpakt funktionéieren, déi an hire Formater vill méi breet opgestallt ass.



4. Wéi ee Budget gouf fir d'Produktioun vum dësem Podcast virgesinn, a wat ass d'Begrënnung dofir?

De Budget fir d'Produktioun vum Podcast an d'Ausschaffe vun enger Kommunikatiounsstrategie huet 25.000 Euro kascht. Dozou kommen nach 1.500 Euro fir den Hosting an 2.600 Euro fir d'Publicitéit, wat e Gesamtmontant vun 29.100 Euro mécht.

5. Plangt d'Regierung änlech Initiative fir Grenzgänger aus anere Länner?

6. Wéi kann d'Regierung dofir suergen, datt déi Informatiounen fir all Grenzgänger zougänglech sinn, onofhängeg vun hirer Sprooch?

Et ass geplangt, eng franséisch Versioun vu *Grenzgeschichten*, déi déi selwecht Themen behandelt, am Laf vun 2026 erauszebréngen. Et gëtt donieft och Iwwerleeungen en engleschsproocheg Podcast ze produzéieren.

7. Wéi goufen d'Themen fir de Podcast erausgesicht, a wie gouf consultéiert?

8. Wann d'Grenzgänger selwer un der Konzeptioun vum Podcast bedeelegt?

Grenzgeschichten ëmfasst insgesamt 7 Episoden. D'Themen, déi behandelt gi, si follgend:

- Aarbechtsgesetz, Kannergeld an Elterengeld (Episod 1)
- Pensioun a Sozialwäsen (Episod 2)
- Ausbildungsméiglechkeeten a Studieförderung (Episod 3)
- Schengener Ofkommen an d'Origine vum der Grenzgängeraarbecht zu Lëtzebuerg (Episod 4)
- Sproochen an Interkulturalitéit am Aarbechtssdag (Episod 5)
- Aarbechtsbedéngungen a Wuelbefanne vu Grenzgänger (Episod 6)
- Participatiounsméiglechkeete vu Grenzgängerinnen zu Lëtzebuerg (Episod 7)

D'Themen vum Podcast goufen vun de Koordinatoren vum Biergerpakt an Zesummenaarbecht mat Experten am Beräich vum der Groussregioun a Grenzgänger ausgeschafft. Am Virfeld vum der Produktioun goufen Echange mam Dr. Christian Wille, Direkter vum Center for Border Studies gefouert, fir pertinent Themen fir de Podcast ze definéieren. Den Dr. Christian Wille huet duerch seng Fuerschung zu den Themen Groussregioun a Grenzgänger e grousst Wëssen, wat pertinent konnt benotzt ginn. Zudeem sief ugemierkt, datt béid Koordinatoren vum Biergerpakt eng Dokteraarbecht iwwer Grenzgänger zu Lëtzebuerg geschriwwen hunn, esou datt si och hiert Wëssen an hir Kontakter an dësem Beräich pertinent konnten abréngen.

D'Podcast-Agentur, déi fir d'Produktioun vum Podcast engagéiert gouf, huet ausserdeem am Virfeld eng SEO-Schlachwortanalyse duerchgefouert, fir erauszefannen, wéi eng Themen oft um Internet recherchéiert ginn am Bezuch op Grenzgänger an den Aarbechtsmaart zu Lëtzebuerg. Esou sinn zum Beispill d'Themen Famill a Studien nach nodréiglech bäigesat ginn.

Grenzgeschichten ass konzeptuell als e Mix vum Expertewëssen an authentesch Geschichten opgestallt ginn. Grenzgänger waren net an der Konzeptionsphas bedeelegt, si goufen awer zu verschiddenen Themen befrot, an hir Temoignage sinn an de Podcast mat agefloss.



Hei drënner d'Lëscht vun de Partner, déi interviewt goufen:

- Martine Mirkes (Juristin bei der CSL)
- Myriam Schank (Direktesch vun der Zukunftskeess)
- Patrice Oster a Michel Kremer (CNAP)
- Sylvain Hoffmann (Direkter vun der CSL)
- Vibeke Walter (GERO)
- Mirko Mazzi (mengstudien.lu)
- Marc Sinner (Directeur Adjoint vum Service formation professionnelle, MENJE)
- Martina Kneip (Direktesch vum Schenge Musée)
- Marie Feunteun-Schmit (Fuerscherin bei der IBA)
- Lou Pepin (Fuerscher op der Uni.lu)
- David Buchel (Aarbechtspsycholog a Responsabel fir d'Enquête Quality of Work Index)
- Anne Daems, (Responsabel vun der Divisioun Zesummeliewen, Familljeministère)
- Max Hahn, Minister fir Famill, Solidaritéit, Zesummeliewen an Accueil

9. Plangt d'Regierung, sensibel Theme wéi Steieren oder Homeoffice transparent unzegoen?

De Podcast abordéiert déi an der Äntwert op d'Fro 7 genannte Sujeten op eng sachlech an transparent Manéier. D'Zil ass et, d'Leit op eng objektiv Manéier iwwer Sujeten z'informéieren, déi fir si relevant sinn, Lëtzebuerg als Aarbechtsplaz ze promouvéieren an e gutt Zesummeliewen tëscht Grenzgänger a Residenten ze fërderen. Weider Informatiounen zu allen Theme kënnen sech d'Nolauschterer dann iwwer d'Links an de Shownotes siche goen.

Lëtzebuerg, den 3. Mäerz 2026

Minister fir Famill, Solidaritéit,
Zesummeliewen an Accueil

(s.) Max Hahn